

Og kodua' Sulat ni Paul dia sog Poktanudanan ditu' sog Tesalonika

Og Piuna Talu' pa'ali sog kodua' Sulat ni Paul dia sog Poktanudanan ditu' sog Tesalonika

Og gotowanan nog poktanudanan dia ni Isukristu ditu' sog Tesalonika misasow ilan, po' mibabong og pikilan nilan pa'ali sog kopokpuli' ni Isukristu. Og duma, mikpoktalul' ilan nog mikpuli' na dow ion dini. Dadi, sa'an ini pinoit ni Paul og kodua' sulat non koni po' posunon non dianilan nog mangka si'oy pokpuli' dini og Kounutan nog si Isukristu, og gotowanan, landu' na og kopoginang nilan nog sinoitan sabap sog ponulu' nog sala kotow kitu' nog landu' bolodusaoy. Ion, modasig og kopogbanta non dia ni Kristu. Pidonsama' ni Paul tumalu' sog poktanadanan dia sog Pogbaya' nog si Isus, nog di' ilan moglola'lola'. Tinolu'an non ilan nog moginang ilan bagun ilan da ompotubu' og dili glawas nilan. Bu sumboy dosop mokpopagon ilan sog tud nilan dia ni Isukristu, minsan si'oy mokobian ilan nog posakit sabap sog kopoktamuy nilan. Tibua, bianan sog gipatan nog Mikpongon dianilan, og Mikpongon da og sumuli' dun sosuku og mikposakit koyon dianilan.

1. Og bokna nog sulat koni, *1:1-2*.
2. Og kopokpotas bu og kopogdongya', *1:3-12*.
3. Og pomali pa'ali dia sog kopokpuli' ni Kristu, *2:1-17*.
4. Og pomali dia sog poktanudanan pa'ali sog molongas nog polomotadon, *3:1-16*.
5. Og doksu'an nog sulat koni, *3:17-18*.

1 ¹Og sulat koni miktidu dianami nog si Paul, si Silas, bu si Timuti. Bu og sinulat nami koni posungu' sog poktanudanan nog mikpoglumpuk dia sog koliwagan bonua nog Tesalonika, nog sinumolabuk ilan na sog Gama' ta nog Mikpongon bu sog Kounutan ta nog si Isukristu.

²Og tulung bu og kotikna' nog pikilan mongon daniu tidu sog Gama' ta nog Mikpongon bu sog Kounutan ta nog si Isukristu.

Og posolamat bu og gyakin

³Pigilugan, sumboy doda' mokposolamat ami kobon non dia sog Mikpongon pa'ali daniu po' posisaya' kopagon og kopongandol niu dianon bu pododungag dosop kobon non og kopoglinolamoy niu dia sog pakasi niu. Sa'an itu' omba'is doda' nog mokposolamat ami dun. ⁴Bu sa'an itu' pogbonsagon nami dosop amu dia sog duma piglumpukanan nog poktanudanan nog og kopongandol niu ompagon tokodoy bu mikogaga amu da dia sog glam nog posakit bu og suloy daniu dion.

⁵Og glam non koyon og tanda' nog modulus doda' og koukuman nog Mikpongon. Po' og doksuan nog sinsaan niu koyon mimung tanan nog ompatut amu sumakup dia sog pigdotu'an non. Sa'an itu' misinsa amu dun numun koni. ⁶Bu biantan dosop sog kodulus nog koukuman non, ain mokposinsa kitu' daniu, pobiantan non dosop ion nog sinsaan. ⁷Bu pulolion non da amu dia sog sinsaan. Bu asta ami dosop. Inangon non ini bila potongowon non na og Kounutan ta nog si Isus tidu sog glangit dunut og moloikatanan nog modasig bu og gliga' nog gapuy. ⁸Polihola'on non ain og momungyas dia sog Mikpongon bu ain ondi' mokokunut sog Gomba'is nog Guksugan pa'ali sog Kounutan ta nog si Isus. ⁹Og polihala' non dianilan, lo'aton non ilan asta sog da' kopus non, bu pintu'on non ilan dia sog sungu'an nog Kounutan ta bu sog landu' nog koba'is nog kopogbaya' non. ¹⁰Glam non koni motuman sog gondow kitu' nog kopokpuli' non. Po' sog kopokpuli' ni Isukristu dini, pogodaban ion nog glam nog pigotowan non. Bu potason ion nog glam nog ain tinumud dianon. Bu amu si'oy, mokpotas amu dosop dianon po' tinumud amu dosop nog gustalan nami koni daniu.

¹¹Dadi sa'an itu', pogyokinan nami amu somul non dia sog Diwata ta bu pongonion nami dianon nog imungon non amu nog ompatut amu dia sog inonggatan non kitu' daniu nog kolegan non nog kopoglokotubu' niu. Bu biantan sog Bolakat non, tumanon non og glam nog glegan niu kitu' nog molongas og tugyu non, bu doksuan dosop nog ginang niu kitu' nog sabap sog kopongandol niu dianon. ¹²Sa'an mogyakin ami nog ma' nini po' bagun og ngalan nog Kounutan ta nog si Isus kosonglitan dun sabap daniu. Bu amu si'oy, kodongya'an amu dosop sabap sog kosolabuk niu dianon, biantan sog tulung nog Diwata ta bu og Kounutan ta nog si Isukristu.

Og gindanan nog kopokpuli' ni Isukristu

2 ¹Dadi pigilugan, pa'ali sog kopokpuli' nog Kounutan ta nog si Isukristu dini bu og kopokpolumpuk non dianita dianon, pongonion

nami diani² di' amu mosompun kobabong, otawaka mosompun kosusa nog minatong na dow og Gondow nog Pogbaya'. Po' ngon dow gotowanan nog miktalu' nog ami dow miguksug dun otawaka mimitua, otawaka sinumulat dun. ³Na' amu tokodoy kolimbungan nog minsan sima og moktalu' dun nog ma' nitu'. Po' mangka si'oy datong og Gondow nog Pogbaya', motongow ta poguna nog landu' tokodoy kopongantu nog gotowanan dia sog Mikpongon. Bu ngon dosop sala kotow nog tumua' nog landu' bolodusaoy. Ion non itu', og doksu'an non og gla'at, asta sog da' kopus non. ⁴Po' ontuan non og glam nog kodiwotaan, bu ain piktamuy nog gotowanan, bu potason non tanan og dili glawas non dia sog glam nilan. Bu kona' tibua nitu' inangon non. Po' mangoy dosop ion ditu' sog Baloy nog Poktomuyan dia sog Mikpongon mangka ion ingkud ditu', mangka non pulonagoy sog gotowanan nog ion og tantu Diwata.

⁵Kolobotan niu da bayu' og piktalu' u kitu' nog kobon ku dion niu, pa'ali sog ma' nion koyon. ⁶Tibua, asta pa numun koni, di' non pa itu' minang. Bu kisunan niu da bog olo og kionggan non. Po' tumua' ion sog matong na og tang non kitu'. ⁷Po' numun koni miktolipun na moglilow og kopongantu nog gotowanan kitu' nog mibuni. Tibua, bila mawa' na og mikangga' kitu' dianon, mangka pa poglaktod og kopongantu nog gotowanan kitu'. ⁸Bu tubus nitu', potongowon og gotow koyon nog landu' bolodusaoy. Bu matoy ion nog sagya da og talu' nog Kounutan ta nog si Isus. Bu mogla'at ion nog silow nog bayu'bayu' ni Isukristu bila matong na ion. ⁹Sog da' pa datong og Kounutan ta, og gotow koyon nog landu' bolodusaoy, mokpotongow ion nog bolakat nog Soitan, bianan dia sog gininisan nog ponginangon non nog gloput nog kosobu'sobu'. Bu modakol og gingyata'anan non, ¹⁰bu gininisan nog kohinangan nog sinoitan, boya'an kolimbungan dun ain posungu' kitu' sog gla'at. Sa'an itu' mogla'at ilan dun po' da' nilan tolima'oy bu posolobukoy dia sog pikilan nilan og Guksugan kitu' nog motud nog bagun ilan bosia mogawon dun tidu sog dusa nilan. ¹¹Dadi sabap ditu', linguton ilan nog Mikpongon bagun ilan tumud nog gloput. ¹²Dadi, og doksu'an non, polihola'on glam nilan dun nog Mikpongon po' da' ilan tud nog motud. Suga'id non, linoliag ilan moginang nog molaton.

Pokpopagon amu sog kopongandol niu

¹³Dadi amu pigilugan, og kololaman nog Kounutan ta, sumboy doda' mokposolamat ami kobon non dia sog Mikpongon pa'ali diani² po' tidu pa sog tolipunan, pinili' non amu bagun amu motabang tidu sog dusa niu bianan sog ginang nog Bolakat nog Mikpongon nog monglonu' diani², bu bianan dosop sog tud niu sog motud. ¹⁴Po' dia sog Gomba'is nog Guksugan nog pigustal nami diani², midongog niu og gonggat nog Mikpongon diani², sumolabuk dia sog kotas nog Kounutan ta nog si

Isukristu. ¹⁵Dadi pigilugan, popagon niu og tud niu bu ponamal amu muktulik dia sog motud nog pianad nami kitu' dianiu nog pibian nami dia sog gustalan bu sog sulat.

¹⁶Dadi, og Kounutan ta nog si Isukristu bu og Gama' ta nog Mikpongon og linumolat dianita. Bu sabap sog tulung non, kipondolo'isogan ita kobon non bu molongas og dodomaan ta. ¹⁷Og pongonion nami dianon nog pondolo'isogan non amu, bu popogonon non dosop amu bagun amu kobon non mokopoginang nog molongas nog ginang, bu moktal' nog molongas nog talu'.

Pogyokinoy niu pa ami

3 ¹Sog gimpusan, pigilugan, pogyokinoy niu pa ami solian ami mogustal nog talu' nog Pogbaya' bagun modali' kopulonag dia sog gotowanan, bu bagun nilan dosop tolima'on mama' nog kotolima' niu kitu' dun. ²Bu pogyokinoy niu dosop ami nog owa'on non ami dia sog kohinangan nog mokolaton nog gotowanan koyon dini po' kona' da glam nog gotowanan og tinumud pa'ali sog Kounutan ta. ³Tibua, og Kounutan ta og kopongondolan bu ion mokpopagon dianiu, bu ion mogipat dianiu dia ni Kindagow. ⁴Bu bianan sog kopoksolabuk ta dia sog Kounutan ta, sumalig ami dianiu nog mononayun og kopoginang niu nog dondagan nami kitu' dianiu. ⁵Bu pongonion nami dia sog Kounutan ta nog ponulu'an non amu sog kodalom nog sabut pa'ali sog glolaman nog Mikpongon dianiu. Bu mokogaga amu mama' ni Kristu.

Og podonsama' sog gotow nog molola'

⁶Dadi pigilugan, dondagon nami amu bianan sog baya' nog Kounutan ta nog si Isukristu, nog pogolig amu dia sog ain pigilugan ta kitu' sog tanud nog mokolola', bu ain onda' kitu' pokokunut nog pinanad nami kitu' dianilan. ⁷Po' sunan niu nog sumboy moglogiling amu nog polomotadon nami. Po' da' ami poglola'lola' kobon nami kitu' dion niu. ⁸Bu ain migbogoy dianami, sinugdaan nami da ilan. Gobi bu gondow miksukat ami po' bagun amu ondi' kologonan mogusiba' dianami. ⁹Mogusoy da bosia bila sagya tobukon nami ain tabang niu kitu' dianami. Tibua, sa'an da' nami inangoy nog ma' nitu', sog kobon nami kitu' dion niu, bagun da mimung nog ami og poglogilingan niu. ¹⁰Po' kobon nami kitu' dion niu, pidonsama' nami na tumalu' dianiu nog mama' nini, “Bila og gotow nog ompok mogusaha, sumboy di' pokpokanon.”

¹¹Po' midongog nami nog ngon dow gotowanan dion niu nog molola' nog di' ilan moksukat, suga'id non, ginangon nilan da' lual sog mogbaya' sog ginang nog duma nilan. ¹²Dadi, bianan sog baya' nog Kounutan ta nog si Isukristu, ain pigilugan ta kitu' sog tanud nog moginang nog ma'

nion koyon, podonsoma'an nami tumalu' nog sumboy mogusaha ilan bu mogusoyusoy ilan na moglokotubu'.

¹³ Bu amu sop pigilugan, na' amu tokodoy motonop moginang nog ain molongas nog ponginangon. ¹⁴ Bu bila ngon daniu nog ondi' mokokunut nog pomali nami koni dini sog surat nami koni, posun niu dia sog kodokolan mangka niu ion pogolig bagun ion kosipogan dun. ¹⁵ Tibua minsan si'oy ma' nitu', na' niu da ion pikilon nog banta niu, suga'id non, pomolioy niu ion nog kolola' non koyon ma' nog kopomali niu dun nog dili gilug niu.

¹⁶ Dadi, og Pogbaya' nog ion og poktiduan nog kotikna' nog pomikilan, kobon non mogbogoy dun daniu sog minsan olo kibianbianan niu. Ion non ion og Kounutan ta nog mogonong dia sog glam niu.

¹⁷ Akon si Paul, og ponogina u koni daniu, akon og dili sinumulat dun. Po' ma' nini og tanda' nog akon doda' og piktidian nog surat koni.

¹⁸ Og tulung nog Kounutan ta nog si Isukristu mongon dia sog glam niu.